



www.BibleForChildren.org

Genesis 3




Adam el sang inen mutan kial Eve,
mweyen el nina kien mwet
moul nukewa.




Na serpent pa kutasrik oemeet ke
ma orakrak nukewa ma LEUM GOD
El orala. El siyuk sin mutan sac, “Ku
pwayena God El fahk mu kom in
tiana kang kutena fokinsak
in ima se inge?”



Ac mutan sac fahk,
“Kut ku in kang kutena
fokinsak in ima se inge
sayen sak soko ma tu
infulwen ima uh. God El fahk nu sesr mu
kut in tiana kang fokin sak soko ah, ac kut
in tia pacna pusral. Kut fin oru,
kut ac misa.”




Na serpent el fahk,
“Tia pwaye. Kom ac
tia misa. God El fahk
angan mweyen El etu
lah pacl se na komtal kangla an,
komtal ac oana God in etu lah
mea wo ac mea koluk.”




Mutan sac liye lah sak soko ah arulana kato, ac fahko kac uh luman ac arulana wo ke mongo, ac el sifilpa nunku lah ac fuka woiya in lalmwetmet. Ke ma inge el eis kutu fahko kac ac kangla.

Na el sang kutu nu sin mukul tumal, ac el kangla pac.



Tukunna eltal kangla ah, na itukyang
nu seltal etauk, ac eltal akilenak lah
eltal koflufol. Ouinge eltal etolla sra
ke sak fig ac sang afunultal uh.





Ac LEUM GOD

El pangon mukul sac ac fahk,
“Kom aya?” Ac mukul sac fahk, “Nga lohng
kom inima uh, a nga sangeng ac wikla liki
kom, mweyen nga koflufol.”





God El siyuk,

“Su fahk nu sum mu kom koflufol an?

Ya kom kang fokinsak soko ma nga tuh

fahk mu komtal in tia kang ah?”



Mukul sac fahk, “Mutan se kom filiya yuruk inge tuh se nu sik fokinsak soko ah, ac nga kangla.”

LEUM GOD EI siyuk sin mutan sac,

“Efu ku kom oru angan?” Mutan sac topuk

ac fahk, “Serpent soko ah kiapweyula, oru nga kangla.”






Ouinge LEUM GOD EI supwalla liki
Ima Eden ac oru elan pikin fohk
uh su el orekla kac.






Na ke layen kutulap in ima sac, El
likiya cherub luo ac sie cutlass firir su
pitukot pitukme nu yen nukewa.
Ma inge ma in taran tuh kutena
mwet in tia tuku apkuran nu
ke sak in
sang mouL.



Na Adam el ona yurin mutan kial, ac mutan sac pitutuyak. El oswela wen se ac fahk, “LEUM GOD EI kasreyu ac se wen se nutik.” Ouinge el sang inel Cain. Tok el oswela pac wen se, Abel. Abel el mwet liyaung sheep, a Cain el mwet ima se.




In kutu pacl tok, Cain el use kutu fokin ima lal, ac sang tuh in mwe kisa nu sin LEUM GOD. Na Abel el use sheep fusr soko ma osweyukla oemeet sin soko sheep natul. El uniya ac sang ip ma wo emeet kac in mwe kisa.



LEUM GOD El in sewowo sel Abel ac ke mwe kisa lal,
a El tia in sewowo sel Cain ac mwe kisa lal. Cain el
arulana foloyak, ac ngetnget
toasr ke kasrkusrak lal.



Na Cain el fahk nu sel Abel, tamulel Ial, “Fahsru kital som nu inima uh.” Ke pacl se eltal sun inima uh, na Cain el forang nu sel Abel ac unilya.



LEUM GOD El siyuk sel Cain, “El aya Abel, tamulel lom?” El topuk, “Nga nikin. Mea, nga mwet in liyaung tamulel luk uh?” Ac Cain el som liki ye mutun LEUM GOD ac muta in acn se pangpang “Nod,” su oan kutulap in acn Eden.



Adam ac mutan kial oswela sie pac wen. Na mutan sac fahk, "God El sifilpa ase wen se nutik in aolulla Abel, su Cain el uniya." Ke ma inge el sang inel Seth.




Tukun pacl sac, Adam el sifilpa mouf yac oalfoko.
Oasr pac tulik mukul ac tulik mutan saya natul,
ac el misa ke el yac eufoko tolingoul.




Ke LEUM GOD El liye lupan koluk lun mwet
nukewa fin faclu, ac lupan nunak koluk
lalos ke pacl nukewa, El arulana auli
lah el oralosla ac fuhlelosi fin faclu.



Yohk oela lal, na El fahk, “Nga fah sukela
mwet nukewa nga orala inge, wi ma
orakrak ac won nukewa, mweyen
yohk toasr luk lah nga oralosla.”




Tusruktu LEUM GOD EI in sewowo sel Noah.
Oasr wen tolu natul Noah, inelos pa
Shem, Ham, ac Japheth.



Tuh God El lungse faclu ouinge: El
ase Wen sefanna natul, tuh elos
nukewa su lulalfongi in el fah tia
misa, a elos fah eis
moul ma pahtpat.



2



60



Rome 3:23

mwet nukewa orekma koluk, ac elos nukewa tia sun lupan
wolana se ma God El akoo nu selos.

Rome 6:23

Tuh molin ma koluk pa misa; a mwe kite lun God pa moul
ma pahtpat yurin Christ Jesus Leum lasr.

Hebrew 9:27

Oakiyuki tuh kais sie mwet in misa pacl se, na toko elos fah
nununkeyuk sin God.



Ephesus 2:8,9

Tuh ke lungkulang lun God, kowos moliyukla ke lulalfongi.
Tia ma kowos sifacna oru, a mwe kite sin God me.
Ke sripen tia ma ke orekma lun mwet, na wangin
mwet in ku in konkin kac.

Rome 10:9,10

Kom fin fahkak lemtulauk lah Jesus el Leum, ac lulalfongi
ku lah God El akmoulyalak liki misa, kom ac fah moulla.
Tuh ke lulalfongi lasr kut aksuwosyeyuk yurin God,
ac kut eis moul ke sripen fahkak lasr.



John 3:16,17

Tuh God El lungse faclu ouinge: El ase Wen sefanna natul, tuh elos nukewa su lulalfongi in el fah tia misa, a elos fah eis moul ma pahtpat. Tuh God El tia supwama Wen natul in tuh nununku faclu, a tuh faclu in eis moul kacl.

Sie John 5:11-13

Pa inge ma loh lun God: God El ase nu sesr moul ma pahtpat, ac kut eis moul se inge sin Wen natul. Kutena mwet su Wen el oasr yorol, oasr moul in el. Kutena mwet su Wen nutin God el tia oasr yorol, wangin moul in el. Nga simis ma inge nu suwos, tuh kowos fah etu lah moul ma pahtpat oasr yuruwos — aok, kowos su lulalfongi ke inen Wen nutin God.



Genesis 3 – 6

Storyline by: Edward D. Hughes

Illustrated by: Byron Unger, Lazarus,
and Alastair Paterson

Adapted by: M. Maillot, Tammy S.

Kosraean Bible (kos)

This text is in the Public Domain due to copyright expiration.

<https://www.bible.com/en-GB/bible/3004/GEN.1.KOS>

©2026 Bible for Children, Inc.

www.M1914.org

www.bibleforchildren.org

